

欽定全唐文

欽定全唐文卷五百八十九目錄

柳宗元 二十一

尚書戶部侍郎王君先太夫人河間劉氏墓誌文

朗州員外司戶薛君妻崔氏墓誌

馬氏女雷五葬誌

唐故尚書戶部郎中魏府君墓誌

唐故朝散大夫永州刺史崔公墓誌

故永州刺史崔君流配驩州權厝誌

唐故中散大夫檢校國子祭酒兼安南都護御史

中丞充安南本管經略招討處置等使上柱國

武城縣開國男食邑三百戶張公墓誌銘并序

唐故邕管經略招討等使朝散大夫持節都督邕

州諸軍事守邕州刺史兼御史中丞賜紫金魚

袋李公墓誌銘并序

唐故邕管招討副使試大理司直兼貴州刺史鄧

君墓誌銘并序

呂侍御恭墓銘并序

唐故嶺南經略副使御史馬君墓誌

唐故安州刺史兼侍御史貶柳州司馬孟公墓誌  
銘

故連州員外司馬凌君權厝志  
故連州員外司馬凌君墓後誌

卷之三

三

欽定全唐文卷五百八十九

柳宗元二十一

尚書戶部侍郎王君先太夫人河間劉氏誌文

夫人姓劉其先漢河間王王有明德世紹顯懿至於唐有  
文昭者爲縣州刺史號良二千石其嗣慎言爲仙居令光  
州長史克荷於前人光州夫人之父也夫人旣笄五年從  
於北海王府君諱某府君舉明經授任城尉左金吾衛兵  
曹修經術以求聖人之道通古今以推一王之典會世多  
難不克如志卒以隱終夫人生二子長曰彝倫舉五經早

天少曰叔文堅明直亮有文武之用貞元中待詔禁中以  
道合於儲后凡十有八載獻可替否有匡弼調護之勤先  
帝棄萬姓嗣皇承大位公居禁中訏謨定命有扶翼經緯  
之績由蘇州司功參軍爲起居舍人翰林學士將明出納  
有彌綸通變之勞副經邦阜財之職加戶部侍郎賜紫金  
魚袋重輕開塞有和鈞肅給之效內贊謨畫不廢其位凡  
執事十四旬有六日利安之道將施於人而夫人卒於堂  
蓋貞元之二十一年六月二十日也知道之士爲蒼生惜  
焉天子使中謁者臨問其家賙以布帛嗚呼夫人之在女

氏也貞順以自處孝謹以有奉其在夫族也祇敬以承上  
嚴肅以莅下事良人四十有九年而勤勞不懈生戶部五  
十有三年而教誡無闕年七十有九而戶部之道聞於天  
下爲大僚垂紫綬以就奉養公卿侯王咸造於門旣壽而  
昌世用羨慕然而天子有詔俾定封邑有司稽於論次終  
以不及時有痛焉是年八月某日祔於兵曹府君之墓銘  
曰

夫人之德溫柔敬直承於陰教式是嬪則克生良子用揚  
懿美有其文武宏我化理天子是毗邦人是望若若紫綬

榮於高堂惟昔孟氏號爲母師在漢稱賢有雋不疑懿懿夫人惟其似之山北之里神禾之原問於靈龜闕此顯魂勒石垂休永永萬年

朗州員外司戶薛君妻崔氏墓誌

唐永州刺史博陵崔簡女諱媛嫁爲朗州員外司戶河東薛翼妻三歲知讓五歲知戒七歲能女事善筆札讀書通古今其暇則鳴絃桐諷詩騷以爲娛始簡以文雅清秀重於當世其後病惑得罪投驩州諸女蓬垢涕號柳氏出也以叔舅命歸於薛惟恭柔專勤以爲婦妻恩其故他姬子

雜已子造次莫能辨無忮忌之行無犯迕之氣一畝之宅  
言笑不聞於鄰元和十二年五月二十八日既乳病肝氣  
逆肺牽拘左腋巫醫不能已期月之日潔服飭容而終年  
若干某月日遷板於洛某月日祔於墓在北邙山南洛水  
東異始佐河北軍食有勞未及錄會其長以罪聞因從貶  
更大赦方北遷而其室已禍異之考曰大理司直仲卿祖  
曰太子右贊善大夫環曾祖曰平舒令煜高祖曰工部尚  
書真藏簡之父曰大理司直煜祖曰某官鮑唐興中書令  
仁師議刑不孥其二世大父也異之他姪子丈夫子曰老

女子曰張婆妻之子女子曰陀羅尼丈夫子曰某實後子  
銘曰

翼翼仁師惟仁之碩一言刑輕縣載二百其慶中缺曾元  
不績簡之溫文卒昏以易七男三女八我之出仍禍六稔  
數存如歿宜福而災伊誰云恤惟薛之婦德良才全鄰無  
言聞臧獲以虔推仁撫庶孩不異憐兄公是怙夫屬忻然  
髮髡峩峩邉豆惟嘉蒸嘗賓燕其羞孔多有苾有嚴神饗  
斯何奚仲仲虺胡祐不遐高曾祖考胡嘏之訛淑人不居  
誰任於家書銘告哀以寘巖阿

馬氏女雷五葬誌

馬室女雷五父曰師儒業進士雷五生巧慧異甚凡事絲  
續文繡不類人所爲者余覩之甚駭家貧歲不易衣而天  
姿潔清修嚴恆若簪珠璣衣紈穀寥然不易爲塵垢雜年  
十五病死後二日葬永州東郭東里以其姨母爲嫂於余  
也將死曰吾聞柳公嘗巧我慧我今不幸死矣安得公之  
文志我於墓其父母不敢以云葬之日余乃聞焉旣而閔  
焉以攻石之後也遂爲砂書元磚追而納諸墓

唐故尚書戶部郎中魏府君墓誌

魏氏世墓於某縣某原唐興有聞士諱之過者與子及孫咸舉進士嗣爲儒家縣州涪城尉諱全璫魏州臨黃主簿諱欽慈太常主簿諱緗尚書膳部員外郎兼江陵少尹諱萬成凡五代名高而不浮於行才具而不得其祿江陵府君益之以閥達之量經緯之謀故豪士賢大夫痛慕加厚生郎中府君諱宏簡字曰裕之以文行知名旣冠而德禮聞於鄉黨旣仕而法制立於官政溫柔發乎外見而人莫不親直方存乎內久而人莫不敬由進士策賢良連居科首授太子校書厯桂管江西福建宣歙四府爲判官副使

累授協律郎大理評事三爲御史賜緋魚袋在州六年而人樂之廉使崔衍曰吾敢專天下之士獨惠茲人乎遂獻於天子拜度支員外郎轉戶部郎中邦賦克舉人望逾重年四十七貞元二十年九月三十日不疾而歿震悼之聲遐邇一辭且曰斯人也而不得爲善之利中人其怠乎君嘗三娶而卒無主婦庭無倚廬堂無抱孤有令兄弟以主其喪有孝女以守其祀故哭於客位弔於殯東者咸加哀焉凡爲部從事府喪而當其位者三州缺而居其守者二皆得其理君之先再世貧不得葬故以祿仕遊於諸侯薄

衣食損車馬凡十有餘祀卒獲於厥心其族屬之無主後者皆位於墓娣姪之無歸從者咸會於家由是處約以終其世既斂家宰庀其政視廩惟釜鍾視藏惟束帛無餘積焉十有一月遣車歸於洛師某日祔於墓監察御史柳宗元聞其道而翫其文也久居又同閑故哀而銘之其辭曰郎中之道惟直是保淳泊坦厚溫恭孝友郎中之文惟孝是宣溥暢周流炳蔚紛綸爲周賢能爲漢賢良始仕讐校篇籍有光仍授使檄訏謨用揚二居郎位征賦以理休聲載起顯命伊始生而不壽孰知其止歿而不嗣孰濟其美

有翩其旗爰舉裳帷行道遲遲望墓而歸象物是宜卜筮  
孔時里人作銘不愧於辭

唐故朝散大夫永州刺史崔公墓誌

維元和五年九月十五日壬子永州刺史崔公薨於位享  
年六十八己未殯於路寢景寅遷神於舟以某年某月日  
歸葬於某縣某原祔於皇考吏部侍郎贈戶部尚書府君  
之墓尚書諱漪元宗南巡內禪聖嗣府君以謀畫定命起  
一旅以復天下厥功載焉尚書之先曰貴鄉丞贈太常少  
卿府君諱子美太常之先曰揚州江都丞府君諱道禎行

高位卑華冠士族公諱某字某承世德之清源浚之以蠲  
潔以端其志采羣言之枝葉植之以茂實以修其能始由  
右千牛備身佐環衛更藍厓三原藍田尉仍有大故三徙  
同位繼授許州臨潁汝州龍興令推以直道二邑齊風哥  
舒曜尹河南鯨寇滑驁黎人播越表公尉河南糗糧芻茭  
戎備畢給版圖田洫民事時又遷揚州錄事參軍實吳楚  
之大都會也政令煩擎貢奉叢沓一日不葺鐫譙四至公  
爲之優游有裕長史司徒杜公與之揖讓異於賓僚入爲  
太子司議郎拜歸州刺史巖險湍悍人類鳥獸古號難理

公克有聲遷永州刺史朝散大夫惟是南楚風浮俗鬼戶  
爲胥徒家有攘梗大者虐鰥孤以盜邦賦毆愚蒙以神訛  
言悖於政經莫有禁禦公於是修整部吏黜侵凌牟漁者  
數百人以付信於下而征貢用集擒戮妖師毀君蒿淫昏  
者千餘室以舉正羣枉而田閭克和寬以容物直以率下  
邦人方安其理縉紳猶鬱其望體魄遽降哀何有窮嗚呼  
公前夫人徐州參軍滎陽鄭鉅女有子曰義和早夭後夫  
人萬年尉范陽盧彤女嘉淑之德繼聞宗族有子曰貽哲  
貽儉克承於家洎公之兄子曰勵曰禮誠願志於墓無忘

公之德銘曰

孰爲德門清河濬源遠哉沄沄自葉而根世有顯懿揚其  
清芬煥炳增華昭於後昆惟鯀與鯉舊史是尊孰爲茂功  
尚書清風藹其有融勃焉而興披草從龍布令諸夏敷和  
六戎赫矣太陽克昇於中孰爲惠政公嗣餘慶形於謠咏  
小程其功大遂其性黠吏是省妖風以正於邑於邦克揚  
休命孰爲遺愛公去昭代邦人斯瘼始焉是賴今也何戴  
孰葬我公於洛之會何以銘之徽音不昧

故永州刺史崔君流配驩州權厝誌

博陵崔君由進士入山南西道節度府始掌書記至府留  
後凡五徙職六增官至刑部員外郎出刺連永兩州未至  
永而連之人憇君御史按章具獄坐流驩州幼弟訟諸朝  
天子黜連帥罷御史小吏咸死投之荒外而君不克復元  
和七年正月二十六日卒孤處道洎守訥奉君之喪踰海  
水不幸遇暴風二孤溺死七月某日柩至於永州八月甲  
子藁葬於社壙之北四百步崔氏世嗣文章君又益工博  
知古今事給數敏辨善謀畫南敗蜀虜西遏戎師其慮皆  
君之自出後餌五石病湧且亂故不承於初今尚有五丈

夫子夫人河東柳氏德碩行淑先崔君十年卒其葬在長安東南少陵北君以竄沒家又有海禍力不克祔三年將復故葬也徒誌其一二大者云

鯢爲祖煜爲父世文儒積彌厚簡其名子敬字年五十增以二葬湘濱非其地後三年辭當備

唐故中散大夫檢校國子祭酒兼安南都護御史  
中丞充安南本管經畧招討處置等使上柱國

武城縣開國男食邑三百戶張公墓誌銘并序

漢光中興馬援雄絕域之志晉武一統陶瓊布殊俗之恩

理隨德成功與時並今皇帝載新景命不冒海隅時惟張  
公祇復厥績交趾之理續於前人公諱某字某某郡人也  
曾祖彥師朝散大夫尚書駕部郎中祖瑾懷州武德縣令  
考清朝議郎試大理寺丞贈右贊善大夫咸有懿美積爲  
餘慶公以忠肅循其中以文術昭於外推經旨以飾吏事  
本法理以平人心始命蘄州蘄春主簿句會敏給厥聲顯  
揚仍以左領軍衛兵曹爲安南經略巡官申固扞衛有聞  
彰徹轉金吾衛判官三厯御史續用宏大揚於天庭加檢  
校尚書禮部員外郎換山南東道節度判官復轉郎中爲

安南副都護賜紫金魚袋充經略副使遷檢校太子右庶  
子兼安南都護御史中丞充本管經略招討處置等使公  
自爲吏習於海邦凡其比較勤勞利澤長久去之則夷獠  
復亂復至而寇攘順化及受命專征得陳嘉謨誓拔禍本  
納於夷軌乃命一其貢奉平其斂施牧人盡區處之方制  
國備刑體之法道阻而通百貨地偏而具五人儲備委積  
師旅無庚癸之呼繕完板榦控帶兼戊己之位文單環王  
怙力背義公於是陸聯長轂海合艨艟再舉而克殄其徒  
廓地數圻以歸於我理烏蠻酋帥負險蔑德公於是外申

皇威旁達明信一動而悉朝其長取州二十以被於華風  
易皮弁以冠帶化姦宄爲誠敬皆用周禮率由漢儀公患  
浮海之役可濟可覆而無所恃乃剗連烏以闢坦途鬼工  
來弁人力罕用沃日之大東成通溝摩霄之阻誓爲高岸  
而終古蒙利公患疆場之制一彼一此而不可常乃復銅  
柱爲正古制鼓鑄旣施精堅是立固圉之下明若白黑易  
野之守險逾邱陵而萬世無虞奇琛良貨溢於玉府殊俗  
異類盈於橐街優詔累旌其忠良太史嗣書其功烈就加  
國子祭酒封武城男食邑三百戶凡再策勳至上柱國三

增秩至中散大夫某年月薨於位年若干天子震悼傷辭  
有加明年其孤某官與宗人號奉裳帷率其家老咨於叔  
父延唐令某卜宅於潭州某原葬用某月某日人謀皆從  
龜兆襲吉乃刻茲石著公之闕以志於邱竈告於幽明銘  
曰

周限荆衡秦開百粵交州之治炎劉是設德大來服道消  
自絕伏波南征漢威載烈宛陵北附晉政爰發我唐流澤  
光於有截皇帝中興武城授鉞肅肅武城惟夫之哲更厯  
毗贊顯揚彰徹旣受休命秉茲峻節度其謀猷守以廉潔

厚農薄征匪貊匪桀通商平貨有來胥悅踐山跨海堅其  
鶴列制器足兵潰茲蟻結烏蠻屈服文單翦滅柔遠開疆  
會朝天闕銅柱乃復環山以若海無邁近賊罔踰越琛賈  
之獻周於窮髮帝嘉成德載旌茂闕增秩策勳土封斯裂  
位厄元侯年虧大耋邦人號呼夷裔悽咽卜葬長沙連岡  
啟穴書銘薦辭德音罔缺

唐故邕管經略招討等使朝散大夫持節都督邕  
州諸軍事守邕州刺史兼御史中丞賜紫金魚  
袋李公墓誌銘并序

公諱某字某實惟文皇帝之元孫別子曰承乾爲皇太子以藩愛逼奪危慄致禍後封恆山爲愍王贈荊州大都督繼別曰象蘄春郡太守贈越州大都督封郇國公大宗曰玭太子詹事贈秘書監生廩尚書左丞凡四代有土田居貴仕公不承之以率南服克荷天庥繼有功德公始以通經入崇文館登有司第選同州參軍入佐金吾衛進太僕主簿參引大駕府移爲左右神策行營兵馬節度以爲推官拜監察御史賜緋魚袋凡二使其率皆范司空希朝進殿中侍御史湖南都團練判官以寬通簡大輔治得中道

府遷主後事師人愛慕欲以貞元故事爲請公恐懼抑留復從浙東爲都團練副使轉侍御史又徙浙西如其職加著作郎凡三使其率皆薛大夫莘刺岳信二州得劉向秘書以能卒化黃白日召徒試術爲仇家上變就鞫無事敕笞殺告者猶降建州司馬陟刺泉州會烏獺夷刺殺郡吏殿縛農民詔以公都督邕州兼御史中丞賜紫金魚袋爲經略招討使既至則弢弓橐甲去斥候禁部內無敢以賊名使得自澣濯諸酋長咸頓首送款放虜獲輸稅奉貢願比內郡人遣子吏都督所人復耕稼無有威刑居五月頃

有黑螭鼓江流壞北岸直城南門覆船殺人然後去父老泣曰吾公其殆矣嘗合汞流黃丹砂爲紫丹能入火不動以爲神服之且十年然卒以是病暴下赤黑數日薨實元和十三年六月十五日年五十七僚宰庀事有緹五兩無金銀泉貝幾不克斂夷人號呼致幣歸以明年月日葬祔其穆長安西南高陽原上夫人陳氏先公十五年歿父曇亦都督邕州終孤孟輿愿且文亞曰仲權次曰季謀年自九歲以下有兩婿博陵崔行儉勁峭有立志滎陽鄭師貞敏捷能羣皆聞名銘曰

文濬維祥實亘實延冢讒不嗣宗以支傳郇公克庸詹事  
繼賢湜湜左丞惟道之宣公寬且惠以教則順五參戎政  
二佩郡印師歡民愛克懷以信詖辭告訟卒白其訊烏獢  
猖狂盜海剽山帝命平南逖彼羣蠻虎龍煌煌英蕩是將  
舟之金玉以爲公服公旣蒞止告以文理推義赴仁弢弓  
服矢闢是垣壘完其父子復我邦賦弛予卒士貌不功矜  
情不伐喜蠻人涕懷投刃以俟方底成績蟲孽告妖悍石  
構災升屋而號椎髻卉裳來賻來觀膾膾鱗原拊之顯魂  
松柏芊芊封域安安代有高墳堯文之孫

唐故邕管招討副使試大理司直兼貴州刺史鄧

君墓誌銘并序

君諱某字某南陽人漢司徒禹之後也曾祖倚皇建州浦  
城令祖少立皇滄州司馬考邕皇左武衛兵曹參軍惟君  
敏給以御下廉忠以承上幹蠱之稱洽於諸侯信謹之跡  
彰於所莅故自始仕以至沒世未嘗無聞焉初以試太常  
寺奉禮郎更職於劍南湖南江西前後連帥咸器其能以  
柄於事於劍南則亭擬閱實以循官刑盡哀敬之情致淑  
問之頌寬猛之適克合於中於湖南則外按屬城內專平

準蒞艸人錫石之地參鳬氏鼓鑄之功溢山告祥國用益  
贍吏無並緣以巧法人無怨讐以苦役凡處斯職莫能加  
焉於江西則旁緝傳置下繩支郡俾無有異政以一於詔  
條財賦之重待君而理無何邕州經略使路公恕奏署試  
大理評事兼貴州刺史參帷幕之任董龜虎之威夷俗敬  
愛革面受事朝廷將以武定南服命安南大校御史中丞  
趙良金爲邕州復以君兼招討判官錄其異能奏加司直  
升招討副使兼統橫廉貴三州事厖茸之下直道有立擴  
悍之內義威必行賦增而不擾法一而無憾然以憂慄間

於多虞卒成耳目之塞遂致齒牙之猾元和五年五月二十一日疾卒於公館年五十五明年某月日返葬於潭州某原夫人隴西李氏大理評事練之女年三十三貞元十六年終於郴州有子四人曰贊曰某贊十三年矣哀禮具焉京兆尹宏農公始由湖南爲江西再以君爲從事知之最厚痛君之能不施於劇任惜君之志見屈於羣疑且以誌授宗元使備其缺古者觀其所使而知在上之德今也觀其所使而知在下之誠嗚呼可無辭乎銘曰

曼姓之裔司徒隆漢惟君是承有植其幹始屬奉常出參

藩翰議讞西蜀平其狴犴巡視南楚總茲條貫貿遷化居  
貨殖攸贊改煎鎔範貢輸增筭旣飭財賦亦專傳館去牧  
荒陬肅其聽斷斂敷以息暴戾斯道行非選事進不避難  
始賴其寧終聞見憚疾與憂積志隨魄散年極中身葬茲  
高岸才耶命耶君子興歎

呂侍御恭墓銘并序

呂氏世居河東至延之始大以御史大夫爲浙東道節度  
大使延之生渭爲中書舍人尚書禮部侍郎刺湖南七州  
生四子溫恭儉讓以溫爲尚書郎再贈至右僕射恭字敬

叔他名曰宗禮或以爲字實惟呂氏宗子尚氣節有勇略  
不事小謹讀從橫書理陰符握機孫子之術曰我師尚父  
胄也大父洎先人咸統方岳今天下將理平蔡克冀幽洎  
戎猶負命早夜呼憤以爲宜得任爪牙畢力通天子命作  
文章咸道其志云又曰由吾兄而上三世世爲進士吾爲  
文不墜教誠獨武事未克纘厥緒因棄去從山南西道節  
度府掌書記預謀畫不甚合以試守軍衛佐加協律郎入  
薦爲長安主簿復出以監察御史參江南西道都團練軍  
事府表進殿中侍御史爲桂管都防禦副使元和八年去

桂州相國尚書鄭公遮留假嶺南道節度判官至廣州病  
痞瘧加癆六月二十八日卒妻裴氏戶部尚書延齡女有  
丈夫子三人曰爽曰瓌曰特女子三人曰環曰鸞曰倩皆  
幼行於道而倩又死遂以柩如洛陽祔葬於大墓款志呂  
氏世仕至大官皆有道宜興於世溫洎恭名爲豪傑知者  
以爲是必立王功活生人不幸溫刺衡州年四十卒恭未  
及理人年三十七又卒世固有有其具而不及其用若溫  
恭者耶恭貌奇壯有大志信善容物宜壽考碩大而又不  
克呂氏之道惡乎興銘曰

颯颯之風兮不可追有志之大乎今安歸呂君去我死乎  
吾誰依

唐故嶺南經略副使御史馬君墓誌

元和九年月日扶風馬君卒命於守龜祔於先君食卜葬  
明年某月庚寅亦食其孤使來以狀謁銘宗元刪取其辭  
曰君凡受署往來桂州嶺南江西荆南道皆大府凡命官  
更佐軍衛錄王府事番禺令江陵戶曹錄府事監察御史  
皆爲顯官凡佐治由巡官判官至押番舶使經略副使皆  
所謂右職凡所嚴事御史中丞良司徒佑嗣曹王臯尚書

胄尚書伯儀尚書昌皆賢有勞諸侯其善事凡管嶺南五  
府儲時出卒致穀以謀畫平哥舒晃假守州邑民以便安  
珍火訖殺吏威海鹽增筭邦賦大減所至皆用是理年七  
十不肯仕曰吾爲吏逾四十年卒不見大者今年至慮耗  
終不能以筋力爲人贏縮因罷休以經書教子弟不問外  
事加七年卒君始以長者重許與聞凡交大官皆見禮司  
徒佑嘗以國事徵顧謂君曰願以老母爲累受託奉視優  
崇至忘其子之去君諱某字某曾祖某某官祖某某官父  
某某官嗣子隴西李氏出曰徵由進士爲右衛胄曹早歿

次四子皆京兆韋氏出曰倣曰倣曰敏曰庭女一人嫁柳氏壻曰宗一其銘曰

不懈於位不替於謀慮寇以平撫民以蘇僭火不孽悍吏不侔惟寶於鹽亦贏其籌公以忠施私以義躋既至於年乃靜於懷衣柔膳甘子侍孫攜觀經考古教導斯齊克壽克樂嗚呼終哉於陰之原爰位其墓千萬子孫來拜來祔

唐故安州刺史兼侍御史貶柳州司馬孟公墓誌

銘

孟氏之孤曰遵慶奉其父命書九篇爲善狀一篇來告曰

月日君薨月日將葬於某敢請刻辭嗚呼公自假左贊善大夫桓王司馬太常少卿爲義成軍中軍兵馬使其帥魏國公耽爲宰相命公左領軍衛將軍事德宗順宗今上立朝九年加朝議大夫居喪會用兵於趙起復居故官爲左神策行營先鋒兵馬使知牙而趙兵罷不受祿去金革服喪終期命安州刺史仍加侍御史安州防遏兵馬使貶柳州司馬公嘗佐魏公平襄陽靖梁州立義成軍魏公宏大恢奇公能以任軍政是以又爲衛將軍虔恭潔廉勤得禮節伐趙之役堅立堡壘誓死麾下法制明具權力無能移

進不避患退不敗禮安州迫寇攘多戎事政出一切吏以  
文持之故貶明年用兵於蔡朝廷諸公洎外諸侯咸以公  
爲請未及徵氣乘肺溢爲水浮膚而卒年六十惟公志專  
於中貌嚴於外嘗立廷中毅然望之若圖形刻像聞國難  
輒不寢食謀度憤吒以故病不可治曾祖某官諱某祖某  
官諱某父某官諱某公之諱曰常謙子遵慶弟曰某銘曰  
魯仲孫氏其世爲孟賁勇光武軻儒紹聖公傳師法以訓  
戎政執稽以庸咸致厥命濟濟於朝冕服以光墨非從利  
終役復喪忠孝孔明君子攸彰昔者雲中六級下吏公刺

於安法亦可議黜伏南荒豪士獻欵聞難以激去食廢寐  
神乖氣離支膈莫遂廷臣進言俟伯拜章帝命將施俄仆  
於京代山丸丸植柏與松其名維何忠孝孟公

故連州員外司馬凌君權厝志

年月日尚書都官員外郎和州刺史連州司馬富春凌君  
諱準卒於桂陽佛寺先是六月告於州刺史博陵崔君曰  
余嘗學黃帝書切脈視病今余肝伏以濇腎浮以代將不  
臘而死審矣凡予之學孔氏爲忠孝禮信而事固大謬卒  
不能有立乎世者命也臣道無以明乎國子道無以成乎

家下之得罪於人以謫徙醜地上之得罰於天以降被罪  
疾余無以禦也敢以鬼事爲累又告爲老氏者某曰余生  
於辰今而寓乎戌辰戌衝也吾命與脈叶其死矣乎吾罪  
大懼不克歸柩於吾鄉是州之南有大岡不食吾甚樂焉  
予其以是葬吾及是咸如其言云孤衷仲求仲以其先人  
之善余也勤以誌爲請嗚呼君字宗一以孝悌聞於其鄉  
杭州刺史常召君以訓於下讀書爲文章著漢後春秋二  
十餘萬言又著六經解圍又文集未就有謀略尚氣節瞶  
人之急出貨力猶棄粃稗年二十以書干丞相丞相以聞

試其文曰萬言擢爲崇文館校書郎又以金吾兵曹爲邠寧節度掌書記泚涇之亂以謀畫佐元戎常有大功累加大理評事御史賜緋魚袋換節度判官轉殿中侍御史府喪罷職後遷侍御史爲浙東廉使判官撫循罷人按驗汙吏吏人敬愛厥績以懋粹然而光聲聞於上召以爲翰林學士德宗崩邇臣議祕三日乃下遺詔君獨抗危詞以語同列王伾畫其不可者十六七乃以旦日發喪六師萬姓安其分遂入爲尚書郎仍以文章侍從由本官參度支調發出納姦吏衰止以連累出和州降連州居母喪不得歸


而二弟繼死不食哭泣遂喪其明以沒蓋君之行事如此  
其報應如此夫人高氏在越孤四人南仲殷仲在夫人所  
未至執友河東柳宗元哀君有道而不明白於天下離愍  
逢尤天其生且又同過故哭以爲志其辭哀焉銘曰

噫凌君生不淑學孔氏揚芬郁好謀謨富天祿讐禁書贊  
推轂觀靈龜獲貞卜徙東越翊明牧罷人蘇汚吏覆升侍  
從躬啟沃匡危疑興大福吏尚書徒隸肅佐經邦財用足  
道之躡身則辱烏江垂九疑麓仍禍凶遘茲酷能知命無  
怨毒罪不泯死猶僇何以葬南嶺曲魂有靈故鄉復封茲

壤歸骨肉爲之銘誌陵谷

故連州員外司馬凌君墓後誌

元和某年月日立太子赦下嘗有非其罪柩得返葬凌氏孤夷仲求仲自連桂陽舉其先人之柩龜筮吉利某年月歸於杭之新城祔於其墓刻前志志其行益以後志志其時立碣於墳東南隅申志於外噫亦勤矣以其先人之行宜克大於後以其孤之志宜克承於初艱其躬以延於無窮承而大宜哉



欽定全唐文卷五百九十目錄

柳宗元二十二

萬年縣丞柳君墓誌

處士段宏古墓誌

潞州兵馬曹柳君墓誌

永州司功參軍譚隨亡母毛氏誌文

寧郭師墓誌

趙秀才羣墓誌

太府李卿外婦馬淑誌

故嶺南鹽鐵院李侍御墓誌

故試大理評事裴君墓誌

故大理評事柳君墓誌

故祕書郎姜君墓誌

故襄陽丞趙君墓誌

故溫縣主簿韓君墓誌

東明張先生墓誌

故處士裴君墓誌

覃季子墓銘并序

續榮澤尉崔君墓誌


先太夫人河東縣太君歸祔誌

伯祖妣趙郡李夫人墓誌銘

叔妣吳郡陸氏夫人誌文

亡姑渭南縣尉陳君夫人權厝誌

亡姊前京兆府參軍裴君夫人墓誌



欽定全唐文卷五百九十

柳宗元

二十二

萬年縣丞柳君墓誌

惟貞元十二年龍集景子三月日前萬年縣丞柳君終於長安升平里之私第享年五十長子宏禮承家當位次曰傳禮幼曰好禮奉夫人洎仲父之命考時定制動合古道三日而殯三月而葬粵五月十九日甲子克開長安縣高陽原祔於先塋禮也先時撰辰酌禮稱義備物外姻畢至宗人來會從弟宗元受族屬之教泣涕濡翰書辭紀行曰

君諱元方字某解人也系自周魯後得柳姓七祖虬後  
魏中書令封美陽公四葉至皇考惇皇朝散大夫資陽令  
祖延州司馬考頤宣州寧國丞濟德克紹厥類藏聰晦明  
粹爲淑和少孤季父建撫字訓道通左氏春秋貫厯代史  
旨畫羅列接在視聽嗜爲文章辭富理精以門廕出身調  
補宣州溧水尉網簿貢職入於天府特授同州馮翊尉改  
京兆府雲陽主簿轉長安主簿遷萬年丞端靖守貞處劇  
不撓秩滿居養素食貧常好竺乾之道自振塵昏之外泊  
如也旣而嬰被沈疾不克永壽姻戚動懷朋友道傷僉曰

天之報施善人何如哉君前娶河南獨孤氏左司郎中緬  
之女無子早世繼室以裴夫人諫議大夫虬之女陰教內  
則著於閨闥有女三人焉嗚呼銘誌之來古矣是不可闕  
遂勒元石措於陰堂銘曰

振振吾宗德之宅耶惟君之德至期頤耶德而不壽今既  
厄耶松柏蒼耶不朽石耶

處士段宏古墓誌

段處士宏古讀縱橫書剛峭少合尤濩落不事產人或交  
之度非義輒去以故年五十不就祿常以法家言抵御史

大夫何士幹延以上座將用之會士幹死聞襄陽節度使于頤愛人大言遂干以兵畫一見喜甚居月餘視頤終不可與立功又遁去隴西李景儉東平呂溫高氣節尚道義聞其名求見大懼畱門下或一歲或半歲與言不知日出溫卒景儉逐前右拾遺張宿與然諾南見中山劉禹錫河東柳宗元二人者言於御史中丞崔公公時降治永州知其信賢徵其去又南抵好義容州扶風竇羣途過桂林守舊知君拒不爲禮君憤怒發病不肯治曰平生見大人未嘗相下今窮於此年加老接接無所容入也益困於俗笑

吾安用生爲埋道邊耳居六月死逆旅中崔公爲出涕命  
特贈賻致其喪來永州哭爲祭之與喪具道里費歸葬澧  
州安鄉縣黃山南麓上君之死元和九年八月十六日後  
某月日葬祖某官父某官妻彭城劉氏子知微知章皆未  
冠銘曰

廉不貪直不倚困者安之通者不以不懲其躡卒以亢死  
觀游非類有賤非鄙何以葬之黃山南趾

潞州兵馬曹柳君墓誌

柳氏子某爲平陸丞王父母之喪寓於外貞元二十一年

始葬於號之閩鄉穸墨遇食乃貽書其族尚書禮部員外郎宗元使爲其誌且曰吾之先自魏已來爲宰相者累世我高祖諱萬齒爲伊闢令襲其先河間郡公曾祖諱某湖州刺史咸有懿德洎於兵曹府君諱某勤身惠志好義能讓而同故交者固直而敬故親者睦凡舉明經者四皆獲美仕初爲陸渾主簿次吳縣尉次上黨丞次潞州兵曹參軍其勾稽摘發毗贊關決無不勝職加朝散大夫某年月日終於官次殯於州若干里會世多難家又貧窶故不及夫事嗚呼我曾祖王父葬於潁陽我伯祖叔祖洎伯父皆

葬閩鄉皇天原望壽里潁陽北臨間其地陰狹岸又數壞  
大懼不克久安神居是以從他兆於茲卜用七月六日甲  
子將以具於元堂之下固故有望乎爾也於是刪其書爲  
文置於郵中俾移於石上

永州司功參軍譚隨亡母毛氏誌文

毛氏夫人父曰儀禹豐州別駕祖宏義濟州戶曹夫人歸  
譚氏曰損爲鄧州司倉參軍損父昌爲常州錄事參軍祖  
曰元愛爲左羽林大將軍宏農男惟譚洎毛氏於周咸爲  
諸侯譚入於莒毛及魏爲后族千歲復合夫人生丈夫子

曰隨隨謹愿好禮始克於裴柳爲姻隨娶裴氏今中書舍人次元之族弟也女子嫁柳氏曰從肇曰予族兄也予早承族兄之教聞夫人之德且曰隨之所以能立洎吾嫂之所以令皆夫人之訓則宜有以文其聲詩刻而措諸墓夫人諱某壽若干某年月日終某月日祔於此誌曰

周之列國譚子毛伯合是二姓從其匹敵夫人有訓乃策厥族惟時善良不享豐福懿厥子姓追號憲德內言不出孰表貞節願垂休銘永誌幽谷

筆郭師墓誌

郭師名無名無字父爽雲中大將無名生善音能鼓十三  
絃其爲事天資獨得推七律三十五調切密邃靡布爪指  
運掌擊使木聲絲聲均其所自出屈折愉繹學者無能如  
自去乳不近葷肉以是慕浮屠道旣失父母卽棄去兄弟  
自髡緇入代清涼山又南來楚中然遇其故器不能無撫  
弄吳王宙刺復州或以告乃延入強之宙號知聲音抃蹈  
以爲神奇會宙貶賀州遂以來性愛酒不能已因縱髮爲  
黃老術薛道州伯高抵宙以書必致之至與坐起伯高襄  
邪人也嗜其音至善處輒自爲擊節教闈管謹視出入餌

仄柏不食穀三年變服遁逃九疑叢祠中披取之益善親遇終不屑卒乘暴水入小船下岣嶁山求道篋會歐陽師死不果受張誠副嶺南又強與偕誠死至是抵予時已得骨髓病日猶鼓音四五行居數日益篤旣病自爲歌死三日葬州北岡西志其詞曰

雲州生柳州死年五十病骨髓天與之音今已矣丁酉之年秋旣季月缺其圍於是始心爲浮屠形道士仁人我哀埋勿棄

趙秀才羣墓誌

嬰白死信孤乃立王侯世家天水邑羣字容成系是襲祖  
某父某仕相及嗟然秀才胡伋伋體貌之恭藝始習娶於  
赤水禮猶執南浮合浦遠遠集元和庚寅神永戢問年二  
紀益以十僕夫返柩當啟蟄瀟湘之交瘞原隰稚妻號叫  
幼女泣和者悽歎行路悒追初憫夭銘茲什

太府李卿外婦馬淑誌

氏曰馬字曰淑生廣陵母曰劉客倡也淑之父曰總既孕  
而卒故淑爲南康謳者李君爲睦州貳狂寇見誣左官爲  
循州錄過而慕焉納爲外婦偕竄南海上及移永州州之

騷人多李之舊日載酒往焉聞其操鳴絃爲新聲撫節而  
歌莫不感動其音美其容以忘其居之遠而名之辱方幸  
其若是也元和五年五月十九日積疾卒於湘水之東葬  
東岡之北垂年二十四銘曰

容之丰兮藝之工隱憂以舒和樂雍佳治彫殞逝安窮諧  
鼓瑟兮湘之滸嗣靈音兮永終古

故嶺南鹽鐵院李侍御墓誌

天寶中詔李氏由涼武昭王以下皆得籍宗正故沂州刺  
史福以姑臧人附屬於寧歧爲族曾祖生樂壽令昱昱生

號州司馬叶世以儒聞叶生監察御史澣字濯纓明兩經  
仕厯永興臨晉尉會天子方事誅伐南平蔡北服趙西走  
戎東討齊魯五年間兵征卒戍耀行千里凡進用唯財賦  
爲難君以試大理評事佐荆南兩稅使督天下諸侯之半  
調食饒給車擊舟連又守湖南鹽鐵轉院以能遷官移嶺  
南益積功勞以介厲敦勤爲率羣吏先年五十三元和十  
三年月日卒妻廬江何氏凡五世世鄭出父曰士鍔季父  
曰士幹有大名君之子二人曰夔曰導女一人曰某夔導  
皆幼不能事何夫人哭且戒柩行萬里人咸觀其禮焉葬

金匱全集卷之三  
伊闕用明年某月日甲子銘曰

涼爲帝基克顧厥允皇宏國牒四邑顯進沂以屬尊世仕  
倚儒憲憲濯纓亦用學徒旣穀旣官式懋爾勞四方用師  
卒食之饒致其廉介率是諸侯於荆於交關石是鈞邦有  
休功惟吏之勤冀施於大以盡其有孰司壽夭君不克久  
吉日來祔伊闕之墓子嗣孫承有達宜興銘詔於神永永  
是徵

故試大理評事裴君墓誌

裴氏之昭曰贈戶部尚書諱某穆曰起居郎諱某生均州

刺史諱某均州與其弟大理更爲刑部郎用文史名於朝  
善杜禮書長子曰某射進士策不中去過汴韓司徒宏迎  
取爲從事以聞拜太子通事舍人進大理評事當伐蔡及  
鄆州嘗爲軍首贊佐有勞旣事將侍太夫人於京師道發  
疽元和十四年月日終於河南敦厚里年若干字曰某弟  
某以其喪歸葬於某縣某里未果娶有男子二人女一人  
男之長曰某通兩經始杖且盧銘曰

世守不遷秀於士鄉不利有司爰客於梁梁委其躬乃相  
戎政宮臣理屬仍受國命南蔡北曹五載首兵柔剛輔理

平視太平馬牛旣寧告養於京棧車草草我來周道載飢  
載勞神奪其孝形經於洛魂其焉如庶終爾誠陰侍里閭  
膳飲不違有弟之恭旣安且盈厥志斯從銘之故人以慰  
爾衷

故大理評事柳君墓誌

晉之亂柳氏始分曰耆爲汝南守居河東又五世曰慶相  
魏魏相之嗣曰旦仕隋爲黃門侍郎其小宗曰楷至於唐  
刺濟房蘭廊四州楷生夏縣令府君諱繹繹生司議郎府  
君諱遺愛皆葬長安少陵原遺愛生御史府君諱開葬南

陽其嗣曰寬字存諒讀其世書揚於文詞南方之人多諷  
其什頗學禮而善爲容修吏事始仕家令主簿進左驍衛  
兵曹試大理評事爲嶺南節度推官荆南永安軍判官府  
罷爲游士出桂陽下廣州中厲氣嘔泄卒於公館元和六  
年八月七日也年四十七前娶瑯琊王拱子拱國子祭酒  
後娶河東裴陵子陵告成令裴氏之出曰裴七君之從弟  
以君之喪歸過零陵哭且告於宗元曰吾伯兄從事嶺南  
其地多貨其民輕亂能以簡惠和柔匡弼所奉假守支郡  
海隅以寧鬪狠仇怨敦諭克順從公於荆綏戎永安仍專

郡治政用休阜是時蜀寇始滅邦人瘞淚懷君之澤咸忘其痛其理也惠而不施之於大其行也和而不至於年其言也文而不顯其聲今將以某月日祔葬苟又不得令詞而誌焉是無以蓋前人之大痛敢固以請嗚呼予懼辭之不令以爲神羞予曷敢不諾銘曰

柳族之分在北爲高充於史氏世相重侯中書之世實曰蘭州夏縣政良司議德優營營御史乃佐元侯惟君是嗣其政克修儲闈補吏環衛分曹南越之龐從事以寧永安披攘荐仍於兵是董是經既柔且平浩浩呻呼革爲和聲

胡不使壽而奪之齡柩於海墮墻於鄧邦厥弟孔哀惟行  
之恭呱呱小子縗而不盧充充令妻髽首而居鳥獸號鳴  
助我踟躕刻此悲辭藏之奧隅

故祕書郎姜君墓誌

祕書郎姜粵字某開元皇帝外孫也始楚國公皎與上游  
益貴幸子慶初得尚某公主生粵粵生三日上曰他物無  
以餉吾孫卽敕有司以第六品告與緋衣銀魚得通籍出  
入凡名是官七十某年終不徙然其間在蜀漢荆楚以大  
諸侯命守州邑輒以勞稱時缺則復命好游嗜音以生貴

富畜妓能傳宮中聲賢豪大夫多與連歡後加老風病手足奇右可用不能就官士有載酒來則出妓搏髀笑戲觀者尚識承平王孫故態元和十四年月日終桂州都督御史中丞裴公曰噫帝戚也葬不可以廉爲具物祭以豚酒月日葬州東南一里子某年若干母曰雷姬銘曰

始賤終貴於世爲遂幼榮老窮在物爲凶均之得喪誰缺誰豐若君者銀朱於始生鐘鼎以及壯不顰顰於進取不施施於驕伉左絃右壺樂以自放雖老而客死未嘗戚乎已與夫拳拳恐惄蒙詔負義得之拘拘榮不益愧以終其

身而不能止者不猶優乎

故襄陽丞趙君墓誌

貞元十八年月日天水趙公矜年四十二客死於柳州官爲斂葬於城北之野元和十三年孤來章始壯自襄州徒行求其葬不得徵書而名其人皆死無能知者來章日哭於野凡十九日唯人事之窮則庶於卜筮五月甲辰卜秦訓兆之曰金食其墨而火以貴其墓直丑在道之右南有貴臣冢土是守乙巳於野宜遇西人深目而髯其得實因七日發之乃覲其神明日求諸野有叟荷杖而東者問之

曰是故趙丞兒耶吾爲曹信是邇吾墓噫今則夷矣直社  
之北二百舉武吾爲子絕焉辛亥啟土有木焉發之緋衣  
緞衾凡自家之物皆在州之人皆爲出涕誠來章之孝神  
付是叟以與龜偶不然其協焉如此哉六月某日就道月  
日葬於汝州龍興縣期城之原夫人河南源氏先歿而祔  
之矜之父曰漸南鄭尉祖曰倩之鄆州司馬曾祖曰宏安  
金紫光祿大夫國子祭酒始矜由明經爲舞陽主簿蔡帥  
反犯難來歸擢授襄城主簿賜緋魚袋後爲襄陽丞其墓  
自曾祖以下皆族以位時宗元刺柳用相其事哀而旌之

以銘銘曰

訓也挈之信也蘊之有朱其紱神具列之懇懇來章神實  
恫汝錫之老叟告以兆語靈其鼓舞從而父祖孝斯有終  
宜福是與百越蓁蓁羈鬼相望有子而孝獨歸故鄉涕盈  
其銘旌爾勿忘

故溫縣主簿韓君墓誌

有唐故溫縣主簿韓愼字某漢弓高侯其先也徙於南陽  
傳世至今唐侍中諱瑗克用貞亮奮於國難傳侍中兄子  
郢州刺史諱某某生御史著作郎諱某某生尚書庫部郎

中萬州刺史諱某嗣以文行大其家業君萬州長子也以  
父任爲建陵挽郎累調授王府參軍襄州襄陽尉至於是  
邑貞元十六年又調於天官署河陽丞未拜十有一日暴  
病卒於長安永崇里先人之廬又十有二日龜策襲吉祔  
於咸陽洪瀆原先人之墓禮也先三日外姻家老謀爲之  
志季弟泰哀不能文故託於友焉嗚呼生也以其弟之恭  
知君之爲友沒也以其弟之戚知君之爲愛惟友愛出於  
孝移於忠施於人事無往不達予故得受其辭書於石曰  
友而愛而忠孝宜之貌稱其行行稱其詞賤而不壽爲善

是悼祔於祖考初筮攸告季也之純寘哀無垠終寢且貧  
控於仁人備物稱家其儀式陳爰相其悲載刻茲珉

東明張先生墓誌

東明先生張氏曰因嘗有以文薦於天子天子策試甚高  
以爲長安尉一年投去印綬願爲黃老術詔許之居東明  
觀三十餘年受畢法道行峻異得衆真祕書訣籙聚經籍  
圖史侔於麟閣以弟回降秩封州先生曰吾老矣支體不  
可解也遂從以去明年回之子襲死哭之慟遂病既亟以  
命回曰吾生天寶訖貞元乙酉歲十月今死於汝之手盈

吾志矣京師吾生也畢原先人之歸也必以返葬乃自爲誌而卒明年正月某日葬如其言弟子某等爲碑以誌於墓辭曰

匪祿而康匪爵而榮漠焉以虛充焉以盈言而不爲華光而不爲名介潔而周流苞涵而清寧幽觀其形與化爲冥寂寞以成其道是以勿嬰世皆狂狂奔利死名我獨浩浩端一以生或曰先生友弟以遁慈幼以死若不能忘情者何耶吾曰道去友耶去慈耶從容以求其得之耶盪莽狠悻道之非耶且夫虧恩壞禮枯槁顙頷墮聖圖壽離中就

異歛然與神鬼爲偶頑然以木石爲類倥侗而不實窮老而無死先生之道固知異夫此也乃書於石以紀

故處士裴君墓誌

河東聞喜裴君諱某字某好學未仕年若干元和十四年月日終於京兆渭南墅君之弟中丞公督桂州命其寮柳宗元以銘君之出河間邢羣以狀來告曰曾祖諱某寧州刺史贈戶部尚書祖諱某起居郎父諱某尚書刑部員外郎議官及浮圖事獨出載在史冊以八使行天下當河北道疑危頑狠難處分之地用天子命制斷得宜於時爲第

一天下皆仰以爲相會疾終再贈至大理卿長老咸曰裴氏世積德起居丞相弟也以文史用大理名世人也咸聞而不大君以友悌慤植承其休光幽而不揚豈天鍾美於中丞嗇而不克並耶不然君無位以夭其可問哉君前娶韋氏成都少尹士謨女生二子字曰某名曰某以文敏中丞公尤愛幸恆從不幸卒於桂林某舉明經後娶於薛氏無子父寢位卑是年月日葬渭南某里遷韋夫人之喪自萬年來有俟猶異室銘曰

壽之沃沃宜其嘉穀有耕有耨同施異祿明昭次穆丞相

之族尚書之孫大理之門有慶實延宜碩而繁不位不年  
晦於邱園懿懿大理惟德之元摧安抑釋太史是論黜陟  
冀幽邦命以尊神嗇豐福不弃於君渭之洋洋爰墓其南  
孝思是懷祖考之依郡人作銘惟相其哀

覃季子墓銘并序

覃季子其人生愛書貧甚尤介特不苟受施讀經傳言其  
說數家推太史公班固書下到今橫豎鉤貫又且數十家  
通爲書號覃子史纂又取鬻老管莊子思晏孟下到今其  
術自儒墨名法至於狗彘草木凡有益於世者爲子纂又

百有若干家篤於聞不以仕爲事黜陟使取其書以氏名  
聞除太子校書某年月日死永州祁陽縣某鄉將死嘆曰  
寧有聞而窮乎將無聞而豐乎寧介而躡乎將溷而遂乎  
葬其鄉後若干年柳先生來永州感其文不大於世求其  
墓以石銘銘曰

困其獨豐其辱

續榮澤尉崔君墓誌

太傅公旣志榮澤君之葬明年爲中書侍郎同中書門下  
平章事以卒榮澤君之嗣曰膺備物具貨入於汴汴陷於

戎喪焉不果行會世難不幸膺亦死膺之亞曰太素仕至  
雲陽令求其志將行謫南海上元和九年移信州猶有累  
不克如其鄉大懼緩慢滋久哭命其子某以某月日啟君  
之喪至於某葬用某月甲子志用太傅公之辭又命河東  
柳某書緩故且志終事之年月日

先太夫人河東縣太君歸祔誌

先夫人姓盧氏諱某世家涿郡壽止六十有八元和元年  
歲次丙戌五月十五日棄代於永州零陵佛寺明年某月  
日安祔於京兆萬年棲鳳原先侍御史府君之墓其孤有

罪銜哀待刑不得歸奉喪事以盡其志姪洎太夫人兄之  
子宏禮承事焉嗚呼天乎太夫人有子不令而陷於大僇  
徒播厲土醫巫藥膳之不具以速天禍非天降之酷將不  
幸而有惡子以及是也又今無適主以葬天地有窮此冤  
無窮旣舉葬紂猶以不孝之辭擬述先德且志其酷焉嘗  
逮事伯舅聞其稱太夫人之行以教曰汝宜知之七歲通  
毛詩及劉氏列女傳斟酌而行不墜其旨汝宗大家也旣  
事舅姑周睦姻族柳氏之孝仁益聞歲惡少食不自足而  
飽孤幼是良難也又嘗侍先君有聞如舅氏之謂且曰吾

所讀舊史及諸子書夫人聞而盡知之無遺者某始四歲  
居京城西田廬中先君在吳家無書太夫人教古賦十四  
首皆諷傳之以詩禮圖史及翦製縷結授諸女及長皆爲  
名婦先君之仕也伯母叔母姑姊妹子姪雖遠在數千里  
之外必奉迎以來太夫人之承之也尊已者敬之如臣事  
君下已者慈之如母畜子敵已者友之如兄弟無不得志  
者也諸姑之有歸必廢寢食禮旣備嘗有勞疾先君將改  
葬王父母太夫人泣以荅事事旣具而大故及焉不得成  
禮旣得命於朝祇奉教曰汝忘大事乎吾家婦也今也宜

老而唯是則不敢暇抑將任焉苟有日吾其行也及命爲  
邵州又喜曰吾願得矣竟不至官而及於罪是歲之初天  
子加恩羣臣以宗元任御史尚書郎封太夫人河東縣太  
君八月會冊太上皇后於興慶宮禮無違者旣至永州又  
奉教曰汝唯不恭憲度旣獲戾矣今將大倣於後以蓋前  
惡敬懼而已苟能是吾何恨哉明者不悼往事吾未嘗有  
戚戚也而卒以無孝道不能有報焉喪主子婦七歲而不  
果娶竄窮徼人多疾殃炎暑熇蒸其下卑濕非所以養也  
診視無所問藥石無所求禱祠無所實蒼黃叫呼遂遘大

罰天乎神乎其忍是乎而獨生者誰也爲禍爲逆又頑狠  
而不得死逾月逾時以至於今靈車遠去而身獨止元堂  
暫開而目不見孤囚窮繫魄逝心壞蒼天蒼天有如是耶  
而猶言猶食者何如人耶已矣已矣窮天下之聲無以舒  
其哀矣盡天下之辭無以傳其酷矣刻之堅石措之幽陰  
終天而止矣

伯祖妣趙郡李夫人墓誌銘

夫人姓李氏辨族氏者曰趙郡贊皇之東祖祖某爲某官  
父冲爲單父尉夫人生於良族嶷然殊異及笄德充於容

行踐於言高朗而不傷其柔嚴恪而不害其和特善女工翦製之事又能爲雅琴素聲操縵之具婦道旣備宜爲君子之配偶焉我伯祖臨邛令府君諱某受夫人於李氏之廟而歸於正室臨邛府君之先曰我曾王父清池府君諱某清池之先曰徐州府君諱某又其先曰常侍府君諱楷常侍之兄曰中書令諱奭自中書以上爲宰相四世噫我伯祖以宗胄碩大而濟其德厚夫人以族屬清顯而修其禮範合二姓以承先祖爲士者榮之故佐奉養承祭祀婦德用光家道甚宜無何伯祖終於臨邛而寃焉夫人從子

而反於淮滸嗚呼我先府君每得仕未嘗不奉迎供養必誠必親男旣立必使之有祿仕女必使之有家將嫁已子必先擇良士可以配諸姑者定然後議焉仲父殿中侍御史府君由是志也夫人生男一人諱某不幸終於宣州旌德尉女三人皆得良壻隴西李伯和爲楊子丞疾痺瘻痼而沒太原王紓今爲右補闕潁川陳襄爲校書郎渭南尉知名貞元十六年王氏始定省扶持自揚州至於京師道路遇疾遂館於陳氏以諸婿之良諸女之養無不得意焉享年八十一是歲六月二十九日終於平康里自小斂至

於大斂比及葬則二壙實參主之有孫二人長曰曹郎奉  
之以纓而正於位八月二十四日葬於萬年縣之少陵原  
實棲鳳原介於我先府君仲父二兆之間神心之所安也  
嗚呼嗣子早天臨邛萬里以歲之不易未克合祔哀孰甚  
焉諸姑命宗元以爲斯志以從人之道內夫家外父母家  
且又葬於我志於我故敘柳氏爲備銘曰

謗其芳壽且康大梁鶴火沈幽光夙淪夫子嗣又喪輜幃  
不復岷之陽兆靈趾棲鳳里艮之山兌之水靈之車當返  
此子孫百代承靈祉誰之言者青烏子

叔妣吳郡陸氏夫人誌文

夫人諱則字內儀姓陸氏家於吳郡蓋江左上族以宗子在他國家牒逸墜故曾王父王父之諱官不克究知而闕其丈父覃皇河南陸渾令夫人生而柔筭而禮會伯舅爲河南尹撰擇察案謂我文學掾仲父士林殊英儒流推高故夫人歸於我夫人之志也溫順以承上沖厚以字下不敢踰於冢婦不敢侮於臣妾是宜允膺福壽集成母儀栗命不淑享年三十有五貞元十二年十一月己亥終於長安太平里第嗚呼夫人生男一人曰曹婆幼孺在抱委縗

就位女一人曰喜子匍匐繙緣寄婦人之手哀哉蓋衰門  
薄祐神道不相顧仲父違背於歲首而夫人捐棄於是日  
遺孤眇藐未克承紹凡我族屬其痛巨乎遂以其年十二  
月十三日庚午合祔於少陵原之墓恭惟仲父之諱字夫  
人之爵齒備於版文今不書懼再告也

亡姑渭南縣尉陳君夫人權厝誌

唐貞元十七年九月六日甲子前渭南縣尉穎川陳君之  
夫人河東柳氏終於平康里將終告於陳君曰吾生四十  
有四年爲陳氏介婦九年謹飭不怠以至此命也旣成婦

矣宜祔於皇姑從兆於三原而不幸中道而有痼疾既不及養於舅姑又不得佐於蒸嘗生君之子不朞月而殯嘗謂君宜有貴位而不克見執親之喪不得終紀皆天譴之大者也且願殺禮以成吾私邇先夫人之墓而窆我焉將俟君之不諱而歸復於正其可也陳君乃卜十二月十八日權厝於城南原曰棲鳳如夫人之志且以時日甲子授於宗元曰子之姑孝於家移於我之長睦於族施於我之黨是用賓而禮之如益者之友今則去我已矣吾無以報焉他日嘗謂子憇而文願以爲誌庶幸而有知將安子

之爲也莫無恨矣嗚呼貴不必賢壽不必仁天之不可恃  
也久矣遂哭而受命書夫人之世以記於茲石夫人六代  
祖諱慶五代祖諱旦位皆至宰相高祖諱楷爲濟州刺史  
曾祖諱某爲徐州長史祖諱某爲清池令考諱某爲臨邛  
令妣李氏趙郡贊皇人其他則俟改葬而後備

亡姊前京兆府參軍裴君夫人墓誌

柳氏至於唐其著者中書令諱奭中書之弟之子曰徐州  
府君諱子夏實有孝德世其家業清池府君諱從裕繼之  
以茂實德清府君諱察躬承之以善政以至於侍御史府

君諱鎮用貞信勁正達於邦家克生賢女以配於裴氏裴氏至於唐其著者禮部尚書諱行儉禮部之子曰侍中諱光庭嗣用忠肅書於國史祠部府君諱貞業之以貞直以至於金吾府君諱微用純懿端亮聞於天下實生良子以配夫人嗚呼夫人與仁孝偕生以禮順偕長始於家純如也終於夫族穆如也其爲子道也孝以和恭以惠取與承順必稱所欲先君與太夫人恩遇尤厚故夫人侍側無威怒之教焉天禍弊族夙遭大故我諸孤奉太夫人之養不敢圖死至於復常夫人三歲無湯沐無鹽酪頓踊叫號哀

徹天地外除髮不勝笄體不勝帶太夫人泣而命之固猶  
不食朝夕諭誨僅而濟焉其爲妻道也貞順之宜恆服於  
身體疑忌之慮不萌於心術忿懥之色不兆於容貌同焉  
而合於禮婉焉而得其正其爲婦道也惟聽順謹敬睦姻  
任恤之行甚備常以不幸不及姑舅之養用爲大恨是故  
相春秋之事眎滌濯羞蓋簷勞以待旦每怵惕之感至焉  
則又移其孝於裴氏之門而以睦於家婦介婦必敬必親  
下以不失其赤子之心姻族歸厚率由是也嗚呼我之大  
譴歟裴氏之大不幸歟以夫人之德行宜貴壽宜康寧然

而年始三十不克至於壽良人官爲參軍事不及偕其貴  
骨髓之疾實鍾於身以貞元十六年三月十三日甲子終  
於光德里第痛矣夫始夫人之疾也夫人之族視之如已  
其家老長妾臧獲之微皆以其私奔謁於道路禱鬼神問  
卜筮者相及也旣病太夫人在側尚慮積憂傷於尊懷猶  
持形立氣給以少間故二稚未斂良人在遠不及有緒言  
遺念以傳於後則我呼天之痛宜有加焉嗚呼天胡厚是  
懿德而闕其報施獨何咎歟予一不知天之忍也旣逾月  
良人至自洛師望門而哭曰無以立吾家成吾身矣凡生

三子幼曰崔七先夫人八月而殯魂氣無不之也次曰崔六後夫人五旬而天因祔焉今其存者曰崔五幸無恙託於乳媼以虞水火哀哉其年八月十八日甲子安厝於長安縣之神禾原從於先塋祔於皇姑宜也母弟號哭而爲之志毒痛憑塞略不能具敢告無愧辭無溢美庶用正直克安神心嗚呼至哀無文至敬不飾故無其辭